

Newsletter

JUNI 2021

ISSN 1821 - 7273 TOLEO NA. 30

Waziri Mkuu awaasa Watumishi wa Mamlaka za Maji kuwa Wazalendo





Toleo Liliopita



BODI YA WAHARIRI

MWENYEKITI

Mha. Godfrey H. Chibulunje

MHARIRI

Bw. Titus M. Kaguo

MHARIRI MSAIDIZI

Bw. Wilfred Mwakalosi

WAANDISHI

Bi. Asiatu Msuya

Bi. Tobietha Makafu

MAKAO MAKUU YA EWURA,

Jengo la EWURA,
Kiwanja Na 3, Kitalu AD,
S.L.P. 2857, Dodoma,
Simu: +255 26 2329002-4,
Nukushi: +255 26 2329005,
Barua pepe: info@ewura.go.tz;
Tovuti <https://www.ewura.go.tz>
Simu ya BURE 0800110030

Mitandao ya Kijamii

Facebook: <https://www.facebook.com/ewuranews>

Twitter: <https://www.twitter.com/ewuratanzania>

You Tube: EWURA TV

YALIYOMO

| | |
|--|----|
| Kutoka kwa Mhariri | 3 |
| Waziri Mkuu awaasa watumishi wa mamlaka za maji kuwa wazalendo..... | 4 |
| EWURA yahamasisha uwekezaji biashara ya vilainishi | 5 |
| EWURA yawanoa Wabunge kuhusu Udhibiti | 6 |
| EWURA yaendesha mafunzo ya mafundi umeme Njombe | 7 |
| EWURA yagundua matumizi ya mitungi ya gesi yenye ujazo mdogo | 8 |
| Uwekezaji vituo vya mafuta vijijini waongezeka | 9 |
| Waziri wa Maji aipongeza EWURA, aagiza mamlaka za maji kuboresha huduma..... | 10 |
| EWURA yatoa adhabu kwa mamlaka za maji zisizotii sheria na kanuni | 11 |
| EWURA watoa fedha za vifaa tiba kwa wodi ya watoto njiti Dodoma | 12 |



PICHA YA MBELE

Waziri Mkuu, Kassim Majaliwa Majaliwa, akizindua

Riporti ya EWURA ya Tathimini ya Utendaji wa Mamlaka za Maji za Mikoa, Wilaya, Miji midogo na Miradi ya Kitaifa kwa mwaka 2019/20.

Kauli Mbiu: "Udhibiti wa Haki kwa Matokeo CHANYA"

KUTOKA KWA mHARIRI

Wapenzi Wasomaji wetu!

Ninawakaribisha wote kujunga nasi katika toleo jipya la Jarida la Mamlaka ya Udhibiti wa Huduma za Nishati na Maji (EWURA), toleo la 30 katika mfululizo wa machapisho ya Majarida ya EWURA kwa mwaka 2021.

Kwa heshima na taadhima napenda kukualika kusoma makala za kuvutia kutoka katika shughuli mbalimbali za kiudhibiti zilizotekelawa na EWURA. EWURA inadhibiti sekta ndogo tatu za nishati ambazo ni Petroli; Umeme na Gesi Asilia na Sekta moja ya Maji; Maji na Usafi wa Mazingira ambapo habari zilioandikwa katika Toleo hili zinahusisha shughuli zilizofanyika katika kipindi cha Januari na Juni 2021. Tolero hili limechukua kazi za miezi mingi zaidi tofauti na utamaduni wetu wa miezi mitatu kutokana na sababu ambazo zilikuwa nje ya uwezo wetu.

Katika kipindi hiki, EWURA imefanya maamuzi mbalimbali ya kiudhibiti ambayo baadhi yake, yamechapishwa katika toleo hili, ambalo linachapishwa katika kutekeleza maagizo ya Sheria ya EWURA Sura na 414 ya Sheria za Tanzania, kipengele cha 6(e).

Kipengele cha 6(e) kinaipa wajibu wa Mamlaka kuhakikisha inaboresha ustawi wa jamii ya Watanzania kwa kuimarishe elimu kwa umma, ufahamu na uelewa wa sekta zinazodhibitiwa ikiwa pamoja na; haki na wajibu wa walaji na watoa huduma wa sekta zinazodhibitiwa; Njia za kutatua migogoro na kusikiliza malalamiko, kazi na shughuli za mamlaka kwa ujumla.

Katika Toleo hili ni pamoja na mambo mengine habari zilizochapishwa ni pamoja na Waziri Mkuu awaasa watumishi wa mamlaka za maji kuwa wazalendo, EWURA yahamasisha uwekezaji biashara ya vilainishi, EWURA yatoa adhabu kwa mamlaka za maji zisizotii sheria na kanuni na habari nyingi za kuvutia.

Karibuni



Titus M. Kaguio

Waziri Mkuu awaasa watumishi wa mamlaka za maji kuwa wazalendo

Na Tobietha Makafu



Waziri Mkuu, Kassim Majaliwa Majaliwa, akizindua Riporti ya EWURA ya Tathimini ya Utendaji wa Mamlaka za Maji za Mikoa, Wilaya, Miji midogo na Miradi ya Kitaifa kwa mwaka 2019/20.

4

Waziri Mkuu wa Jamhuri ya Muungano wa Tanzania, Mhe. Kassim Majaliwa (Mb) amezindua ripoti ya tathmini ya utendaji wa Mamlaka za Maji za Miji Mikuu ya Mkoa, wilaya na Miji Midogo ya EWURA kwa mwaka wa fedha 2019/20, katika hafla iliyofanyika ukumbi wa Chuo cha Mipango Jijini Dodoma mwezi Mei mwaka huu.

Akizindua ripoti hiyo, Waziri Mkuu amewataka watendaji katika mamlaka zote za maji nchini, kufanya kazi kwa kutanguliza uzalendo, uadilifu na weledi ili kutoa huduma ilio bora. Alisema "Serikali imekua ikifanya jitihada kuhakikisha huduma ya maji inawafikia wananchi kama inavyotakiwa, lakini kumekua na watendaji, wasiotimiza majukumu yao vizuri, nataka kila mmoja afanye kazi kwa weledi ili wananchi wapate huduma za maji."

Aidha, ameitaka EWURA kusimamia uboreshwaji wa huduma za maji na kujenga utaratibu wa kufuatilia, uboreshaji wa sera na kanuni, katika kuhakikisha wananchi wanapata

huduma bora za maji ipasavyo. Awali Waziri wa Maji mhe. Jumaa Aweso (Mb), alisema Wizara itahakikisha wananchi wanapata huduma bora za maji na haitavumilia mtu ye yeyote atakayerudisha nyuma jitihada hizo.

Akitoa taarifa kuhusu ripoti hiyo, Kaimu Mkurugenzi Mkuu wa EWURA, Mhandisi Godfrey Chibulunje alisema, ripoti hiyo itasaidia katika kuimarisha utendaji kwa mamlaka zote. Amesema, "Katika tathimini iliyofanyika mwaka huu, kuna mamlaka tatu zilizofanya vizuri na kuwa washindi wa jumla wa kwanza, ambazo, katika kundi la Miradi ya Kitaifa ni mamlaka ya maji Kahama Shinyanga (KASHWASA), kwa mamlaka za Miji Mikuu ya Mikoa Mamlaka ya maji Moshi (MUWSA), kwa Miji Midogo na Mamlaka ya Biharamulo."

"Mamlaka hizi tatu bora zimezawadiwa Cheti, Kombe na shilingi milioni 21 kila moja ambazo watazitumia kununua dira za maji" alisema.

Mamlaka nyingine za Maji zilizofanya vizuri katika utoaji huduma ya

Maji na Usafi wa Mazingira nchini kwa maeneo tofauti na kupatiwa tuzo ni vyeti ni Iringa (IRUWASA), Masasi Nachingwea (MANAWASA), Ngara, Mwanza (MWAUWASA), HTM, Nzega, Igunga (IGUWASA), Kahama na Kishapu.

Aidha Mhandisi Chibulunje amezitaja mamlaka za maji, zilizowasilisha tozo ya udhibiti wa huduma za maji kwa asilimia 100, ambazo ni Babati, Kahama, Dodoma, Iringa, Moshi, Mahenge, Mombo na Orkesumet.

Mamlaka ambazo hazikufanya vizuri kwa mwaka wa fedha 2019/20, ni Bariadi na Vwawa-Mlowo kwa Mamlaka za mikoa, Maswa kwa Mamlaka za Miradi ya Kitaifa na Tunduma, Kilindoni na Ludewa kwa Mamlaka za Wilaya na Miji Midogo.

Mhandisi Chibulunje alihitimisha kwa kusema, EWURA ikishirikiana na Wizara, imejipanga kufanya ukaguzi maalum (special inspection), kwa mamlaka zote zilizofanya vibaya ili kubaini sababu za utendaji mbovu na kushauri namna ya kutatua.

EWURA yahamasisha uwekezaji biashara ya vilainishi

Na Asiatu Msuya



Hivi ni baadhi ya vilainishi vinavyoingizwa nchini ambapo Tanzania inatumia zaidi ya lita milioni 30 kwa mwaka wakati inazalisha lita milion 20 tu.

5

Mamlaka ya Udhibiti wa Huduma za Nishati na Maji (EWURA) imewahamasisha wafanyabiashara, wawekezaji na Watanzania kwa ujumla kuwekeza katika biashara ya vilainishi ili kukidhi nakisi ya mahitaji ya takribani lita milioni 10 za vilainishi nchini.

Akiongea kuhusu mkakati mahsusi wa Mamlaka wa kuboresha uingizwaji, uuzaaji na matumizi ya vilainishi bora nchini, Mkurugenzi wa Petroli wa EWURA, Bwana Gerald Maganga amesema: "Matumizi ya nchi kwa mwaka ni zaidi ya lita milioni 30 za vilainishi na kiasi kinachozalishwa ni takribani lita milioni 20 pekee, hivyo kuwa na nakisi inayoagizwa kutoka nchi za Uarabuni, Afrika Kusini na Kenya."

Bw. Maganga amesema nakisi ya mahitaji ya vilainishi imesababisha

mwanya wa uingizwaji nchini vilainishi visivyokidhi ubora na bila ya kibali cha EWURA; uanzishwaji wa viwanda vya kutengeneza vilainishi pasipo kufuata taratibu na sheria, na wafanyabiashara wasio waaminifu ambao wamekuwa wakijaza (repacking) vilainishi visivyokidhi viwango kwa kutumia vifungashio na chapa zinazoaminika na hatimaye kuuzwa kwa wingi maeneo mbalimbali nchini.

Changamoto nyingine ni elimu duni kwa wauzaji na walaji juu ya vilainishi bora hasa vya magari.

Meneja Mawasiliano wa EWURA, Bwana Titus Kaguo alitumia fursa hiyo kuhimiza wafanyabiashara kuwekeza kwa wingi katika utoaji wa huduma ya vilainishi na kuwasisitiza kufuata Sheria na Kanuni na kwamba wote wanaokiuka taratibu zilizowekwa watachukuliwa hatua za kisheria.

Bwana Kaguo amesema EWURA itaendelea kutatua changamoto katika biashara ya vilainishi kwa ushirikiano na vyombo vingine vya Serikali ikiwa ni Pamoja na TBS, FCC, TRA, Mkemia Mkuu wa Serikali (GCLA) na Polisi.

Ikumbukwe kuwa, kwa mujibu wa Kifungu cha 131 (1) cha Sheria ya Petroli, 2015, yeoyote anayetaka kufanya biashara inayosimamiwa na EWURA lazima aombe na kupewa leseni.

Kuna aina tatu za leseni za vilainishi; leseni kwa ajili ya viwanda vya kutengeneza vilainishi; leseni kwa ajili ya waagizaji wa jumla wa vilainishi; na leseni kwa ajili ya wasambazaji wa vilainishi.

Kwa sasa viwanda vinavyozalisha vilainishi hapa nchini, ni vinne tu ambavyo ni Petrolube, General Petroleum Ltd, Oryx Energies na Tanzania Mineral Oil.

EWURA yawanoa Wabunge kuhusu Udhibiti

Na Asiatu Msuya



6

Kaimu Mkurugenzi Mkuu wa EWURA, Mhandisi Godfrey Chibulunje (aliyesimama) akiwasilisha mada mbele ya Kamati ya Kudumu ya Bunge ya Nishati na Madini katika jitihada za EWURA kutoa elimu kwa taasisi hiyo muhimu kwa utungaji wa Sheria.

Mamlaka ya Udhibiti wa Huduma za Nishati na Maji (EWURA) imetoa elimu kwa Kamati ya Kudumu ya Bunge ya Nishati na Madini kuhusu udhibiti wa huduma za Nishati na Maji na Usafi wa Mazingira.

EWURA imechukua hatua hiyo ikiwa ni njia ya kuendelea kuimarisha uelewa wa masuala ya udhibiti kwa wabunge na utekelezaji wa kifungu cha 6 (e) cha Sheria ya EWURA, Sura ya 414 ya Sheria za Tazania, inayoitaka Mamlaka kuhakikisha wananchi na wadau wake wote wanaelimishwa juu ya majukumu, haki na wajibu wao na namna ya kuwasilisha malalamiko kuhusu huduma zinazodhibitiwa.

Akizungumza katika semina hiyo iliyofanyika jijini Dodoma hivi karibuni, Kaimu Mkurugenzi Mkuu wa EWURA, Mhandisi Godfrey

Chibulunje, alieleza kuwa EWURA imeimarisha utendaji wake kwa kutoa leseni kwa haraka (miezi 2), kwa uwazi, na ushirikishwaji mpana ili kuhakikisha kuwa, huduma za udhibiti zinapatikana kwa uhakika.

Aidha, Mhandisi Chibulunje alieleza kuwa, Mamlaka imekuwa na desturi ya kukutana na makundi ya wadau wake mbalimbali kuwaelimisha kuhusu udhibiti na kwamba wabunge ni moja ya wadau muhimu wa Mamlaka.

“Matokeo ya udhibiti yanachangiwa na ushiriki wa wadau wake katika utekelezaji wa shughuli mbalimbali za kiudhibiti sambamba na kufuata taratibu zilizowekwa,” alisema Mhandisi Chibulunje.

Meneja Uhusiano wa EWURA, Bwana Titus Kaguo, alisema kuwa, EWURA itaendelea kutoa ushauri

kwa Serikali katika kuandaa sera, sheria na kanuni zitakazowezesha kukua kwa sekta za nishati na maji na kuendelea kusimamia watoa huduma ili kuhakikisha huduma zinakuwa bora kwa manufaa ya taifa na watanzania wote kwa ujumla.

Mwenyekiti wa Kamati ya Kudumu ya Bunge ya Nishati na Madini, Mhe. Kenneth Nollo alieleza kufurahishwa kwake na hatua ya EWURA kuwafunda masuala ya udhibiti na kuipongeza Mamlaka kwa kendelea kutekeleza shughuli za udhibiti kwa ufanisi.

“Ni jambo la kufurahisha kushuhudia mchango mkubwa wa EWURA katika kudhibiti mfumko wa bei, uwekezaji binafsi katika umeme, ukuzaji wa sekta ya gesi asilia na uiamarishaji wa mamila za maji nchini” Alisema Mhe. Nollo.

EWURA yaendesha mafunzo ya mafundi umeme Njombe

Na Tobietha Makafu



Waziri wa Nishati, Dkt. Medard Kalemani akiwa katika picha ya pamoja na wakandarasi na mafundi umeme baada ya kufungua warsha ya mafundi hao kutoka mkoa ya Morogoro, Iringa, Tabora, Dodoma na Singida, iliyofanya hivi karibuni.

Mamlaka ya Udhibiti wa Huduma za Nishati na Maji (EWURA), kuitia ofisi yake ya Kanda ya Nyanda za Juu Kusini mkoani Mbeya, imewapa semina ya siku moja kwa mafundi umeme wa mkoa wa Njombe, kuhusu matakwa ya sheria ya umeme ya mwaka 2008, pamoja na Kanuni za Ufungaji wa umeme za mwaka 2019.

Semina hiyo iliyofunguliwa na Mwakilishi wa Mkuu wa wilaya ya Njombe Bi. Lilian Mnyomele, ambaye pia ni Katibu tarafa wa halmashauri ya Njombe Mjini, ililenga kuwajengea mafundi hao uelewa na uwezo, juu ya kanuni za ufungaji wa mifumo ya umeme, pamoja na kutii sheria katika kufanya shughuli zao za umeme.

Sheria ya Umeme kwa mwaka 2008, inataka mtu yeyote anayefanya shughuli za ufungaji umeme katika ngazi yeyote, awe na leseni ya EWURA, ili kuhakikisha shughuli hizo zinafanya na wataalamu wenye uwezo stahiki kwa usalama wa watu na mali zao. Mafundi umeme na wakandarasi

zaidi ya 100 walihuduria semina hiyo kutoka wilaya za Njombe, Ludewa na Wang'ingombe.

Akizungumza baada ya semina hiyo, Fundi umeme kutoka wilaya ya Ludewa Bw. Aspiki Mwakibiki alisema, "Tunawashukuru sana EWURA kwa semina hii kwani sasa nitafanya kazi kwa kufuata sheria na pia kwa kutumia leseni ya EWURA nitawenza kupata kazi nyingi zaidi, na tutawaondoa vishoka wanaofanya kazi mtaani, bila kuwa na elimu na ujuzi wa kutosha kufanya kazi hii."

Meneja wa EWURA Kanda ya Nyanda za Juu Kusini Mhandisi Karim Ally, alisema, "Elimu hii inalenga kukabiliana na wimbi la vishoka wanaozurura mitaani na kufanya kazi za umeme kinyemela bila kuwa na leseni ya EWURA."

Akiongelea utaratibu wa kupata leseni ya umeme, Mhandisi Ally alisema, maombi yanafanya wa mtandaoni kuitia mfumo uitwao LOIS yaani Licensing and Order Information System; unaopatikana kuitia kiunganishi <https://lois.ewura.go.tz> au kuitia katika tovuti ya Mamlaka www.ewura.go.tz.

"Mwombaji anapaswa kuwa na nakala ya picha ya rangi (paspoti) yenye rangi ya bluu, Wasifu (Curriculum Vitae), Vyeti ya elimu ya ufungaji umeme, Risiti ya malipo ya maombi ya leseni, Hati ya Kusafiria /Kitambulisho cha Taifa/Hati ya Kupigia Kura" alisema.

Leseni za umeme zinatolewa katika madaraja mbalimbali kuendana na sifa za muombaji. Daraja A ni fundi mwenye uwezo wa kufanya Shughuli zote za ufungaji na usambazaji umeme, Daraja B Ufungaji umeme mpaka msongo wa kati hadi Volti 33,000, na Daraja C Ufungaji umeme wa msongo usiozidi Volti 400.

Mengine ni Daraja D Ufungaji umeme wa msongo usiozidi Volti 220, Daraja W atafanya kazi chini ya usimamizi wa mwenye leseni Daraja A, B, C au D. S1 Kazi maalumu za umeme kwa Misongo yote, S2 Kazi maalum za umeme wa msongo hadi Volti 33,000, S3. Kazi maalumu za umeme wa msongo hadi Volti 1000.

EWURA yagundua matumizi ya mitungi ya gesi yenye ujazo mdogo

Na Tobietha Makafu



Baadhi ya mitungi ya gesi ya kupikia imekuwa ikiuzawa chini ya ujazo unaoruhusiwa na mdhibiti.

Mamlaka ya udhibiti wa Huduma za Nishati na Maji (EWURA), imewakumbusha watumiaji wa gesi ya kupikia majumbani (LPG), kuhakikisha gesi wanayonunua inapimwa kwenye mzani, na mtungi kufungwa lakiri ili kuhakikisha ujazo sahihi sambamba na ule ulioandikwa katika mtungi wa gesi.

Sambamba na hilo, EWURA imegundua uwepo wa wizi wa gesi ya kupikia kwa wafanya biashara ambao sio waaminifu, ambao wanapunguza gesi yenye ujazo wa kilo 38 katika mitungi midogo hivyo, kuuza gesi yenye uzito pungufu kwa wateja wao.

Akizungumzia wizi huo Meneja wa Mawasiliano na Uhusiano EWURA Bw. Titus Kaguo alisema, "kimsingi upunguzaji wa gesi kwenye mitungi ya LPG unafanyika kutoka kwenye mitungi ya kilo 38 kutohana na utofauti wa bei, hii ina maana kwamba ukinunua mtungi wa gesi wa kilo 38 bei yake ni rahisi ukilinganisha na ule wa kilo 6."

Bw. Kaguo ameongeza na kusema "Baadhi ya wanaopunguza gesi, huchukua mitungi ya kilo 38 na kupunguzia kwenye ile ya kilo 15 na kupata mitungi mitatu yenye kilo 32 badala ya 15 kila moja na akiweka kwenye mitungi ya kilo sita hupata mitungi 7 yenye

uzito wa kilo tano na ushee na kuiiza kwa bei ile ile kama ipo kamili."

Akizungumzia suala hili Meneja wa Mawasiliano na Uhusiano EWURA Bw. Titus Kaguo amesema, mamlaka imekubaliana na wafanyabiashara wa gesi kutouza mitungi ya kilo 38, kwa mtu mmoja mmoja kwa matumizi ya majumbani na kwamba mitungi hiyo inatakiwa kuuzwa kwa taasisi mbalimbali kama shule, hoteli na jeshini.

Mfanya biashara anayeuzza gesi ya kupikia bila ya kuwa na mzani adhabu yake ni kulipa fine ya Shilingi Milioni tatu.

Uwekezaji vituo vya mafuta vijijini waongezeka

Na Asiatu Msuya



Mbunifu wa vituo vya mafuta vijijini akioneshwa mfano wa kituo kwa Menejimenti ya EWURA hivi karibuni. Ujenzi wa vituo hivyo utasidia sana upatikanaji wa mafuta vijijini.

9

Mamlaka ya Udhibiti wa Huduma za Nishati na Maji (EWURA) imetoa leseni 68 zaidi za vituo vya mafuta maeneo ya vijijini kwa mwaka 2020, na kufanya jumla ya vituo hivyo kufikia 197 kutoka 129 mwaka 2019.

Ongezeko hilo ni matokeo ya hatua kadhaa zilizochukuliwa na serikali kwa lengo la kushamirisha uwekezaji katika vituo vya mafuta vijijini. Hatua hizo ni pamoja na marekebisho ya Kanuni za Petroli (Uuzaji wa jumla, Uhifadhi, Rejareja na Matumizi Binafsi) inayowajibisha wafanyabiashara wenyewe angalau vituo vinne (4) katika majiji, manipaa wilaya au miji kujenga angalau kituo kimoja cha mafuta katika mji mdogo au kijiji kisicho na kituo.

Hatua nyingine ni kutoa leseni zenye masharti kwa waendeshaji wa vituo vya mafuta maeneo ya

vijijini ili watoe huduma ikiwa vituo vyao vinakidhi viwango vya kiufundi vinavyohitajika na vinaziingatia masuala ya afya, usalama na mazingira (HSE).

EWURA imetoa leseni mpya 217 kwa mwaka 2019/ 20 katika huduma mbalimbali zinazotolewa katika mkondo wa kati na wa chini wa sekta ya petroli.

Leseni hizo ni pamoja na tano za biashara ya jumla ya mafuta, 178 za biashara ya rejereja ya mafuta, 14 za biashara ya jumla ya vilainishi, tano za matumizi binafsi, tatu za usambazaji wa gesi ya kupikia, 11 za hifadhi ya mafuta na moja ya usambazaji wa vilainishi.

Kaimu Mkurugenzi Mkuu wa EWURA Mhandisi. Godfrey Chibulunje amesema kuongezeka kwa mahitaji ya bidhaa za petroli katika maeneo

ya vijijini, ukuaji wa shughuli za kiuchumi na kuongezeka kwa mitandao ya barabara inahitaji uwekezaji katika uuzaji na usambazaji wa bidhaa za mafuta ya petroli ili kuhakikisha huduma inafika kote nchini.

Ripoti ya utendaji wa sekta ya mafuta kwa mwaka 2020, imeonyesha kufikia 31 Desemba 2020, kumekuwepo na ongezeko la asilimia 10.2 ya vituo vya mafuta nchini hadi kufikia 1,759 kutoka 1,596 kwa mwaka 2019.

Kwa upande wake, Mkurugenzi wa Petroli wa EWURA Bwana Gerald Maganga amesema Mamlaka ina mpango wa kuimarisha shughuli za ukaguzi na ufuutilaji ili kuchoea ujenzi wa vituo vya mafuta vijijini, licha ya ukweli kwamba, bado kumekuwa na mkusanyiko mkubwa wa huduma hizo maeneo ya mijini.

Waziri wa Maji aipongeza EWURA, aagiza mamlaka za maji kuboresha huduma

Na Tobietha Makafu



Waziri Mkuu, Kassim Majaliwa Majaliwa, akikabidhi tuzo ya ushindi wa jumla kwa Mwenyekiti wa Bodii ya MUWSA, baada ya Mamlaka yake kuibuka mshindi wa jumla kwa Mamlaka zote za Maji na Usafi wa Mazingira wakati wa uzinduzi wa Ripoti ya Tathmini ya Utendaji wa Mamlaka za Maji za Miji Mikuu ya Mkoa, wilaya na Miji Midogo ya EWURA kwa mwaka wa fedha 2019/20.

10

Waziri wa Maji, Mhe. Jumaa Aweso, amewapongeza watumishi wa Mamlaka ya Udhhibit wa Huduma za Nishati na Maji (EWURA) na kuwataka wahakikishe mamlaka zote za maji nchini zinaboresha huduma za maji kwa kutoa ankara sahihi, kufuata sheria katika utoaji wa huduma za maji na kwamba Mwananchi yoyote asikatiwe maji kuanzia siku ya ljumlahia mchana, siku za mwisho wa wiki na siku za sikukuu.

"Siku za mwisho wa wiki na zile za sikukuu ofisi zote zimefungwa na watu wapo majumbani, wanahitaji maji ili kufanya shughuli zao za kila siku, je mnataka huyu mwananchi akalipie wapi?" aliuliza.

Kuhusu ubovu wa miundombinu na upotevu wa maji, Waziri Aweso ameitaka EWURA kuhakikisha inazismamia mamlaka za maji nchini kuboresha miundombinu na kudhibiti maji yanayopotea njiani bila kumfikia mtumiaji wa mwisho.

"Suala la kelele za upotevu wa maji lifike mwisho na mamlaka za maji zitakazo fanya vibaya katika hili zichukuliwe hatua", alisisitiza.

Akizungumzia kuhusu wateja sugu wasiolipia ankara za maji, Mhe. Aweso alilitaka EWURA iongeze nguvu katika kutoa elimu kwa umma juu ya ulipaji wa bili za maji kwa wakati, na kwamba bili anayopatiwa mteja ni sawa na notisi ya siku 30, hivyo mteja asipolipa ndani ya siku 30, mamlaka ya maji inaweza kumkatia mteja huyo huduma ya maji.

"Ni haki ya Mwananchi kupatiwa huduma ya maji, pia asisahau ana wajibu wa kulipia maji hayo, mwananchi apewe elimu ili aone fahari kulipia huduma, na asibambikiwe bili wala kutozwa huduma ambazo hazijapitishwa na EWURA" alisisistiza

Mhe. Aweso amemalizia kwa kutoa pongezi kwa EWURA kwa utendaji mzuri na kuwataka wafanyakazi wawe na ushirikiano na kufanya kazi kwa umaja ili kufikia lengo la uwepo wa taasisi hiyo nchini.

"Najua EWURA inauwezo mzuri wa kufanya kazi, hivyo niwatake mfanyi kazi kwa umaja na mshikamano, huku mkiendelea

kutafsiri malengo ya kuanzishwa kwa EWURA na malengo hayo yatafsiriwe kwa vitendo."

Naye Katibu mkuu wa wizara ya maji Mhandisi Antony Sanga aliipongeza EWURA na kuwataka watumishi wake wasijione wapweke kwani wanachokifanya Watanzania wengi wanakiona na wamesaidia unafuu katika huduma wanazosimamia nchini hususani sekta ya maji ambayo anaisimamia.

Kaimu Mkurugenzi Mkuu wa EWURA Mhandisi Godfrey Chibulunje, alimhakikisha Mhe. Aweso kwamba EWURA watumishi wa EWURA wataendelea kufanya kazi kwa bidii na kwamba, msisitizo mkubwa utawekwa katika kuhakikisha usimamizi mkubwa kwa mamlaka za maji ili kuboresha huduma ya maji nchini.

Katika kikao hicho cha siku moja, Mhe. Aweso aliambatana na Naibu Waziri wa Maji Mha. Maryprisca Mahundi na Katibu Mkuu wa Wizara ya Maji Mha. Anthony Sanga.



EWURA yatoa adhabu kwa mamlaka za maji zisizotii sheria na kanuni

Na Tobietha Makafu



Ujumbe wa Bodi ya Wakurugenzi na Menejimenti ya EWURA wakikagua mtambo wa kuchujia maji kutoka kwenye chanzo cha maji cha Shinyanga-Kahama, Ziwa Victoria.

Mamlaka ya Udhibiti wa Huduma za Nishati na Maji (EWURA), imetoea adhabu kwa mamlaka za maji na usafi wa mazingira nchini, ambazo zimekua zikienda kinyume na taratibu, kanuni na sheria katika utoaji wa huduma za maji safi na usafi wa mazingira nchini.

Hatua hiyo imefikiwa baada ya EWURA kupokea malalamiko mengi yaliyohusu kubambikiwa bili, usomaji mita usiokuwa shirikishi na ukataji wa huduma ya maji pasipo kufuata kanuni na taratibu zilizowekwa.

Malalamiko hayo yalisababisha EWURA kusitisha mabadiliko ya bei zilizopaswa kutumika kuanzia mwezi Januari mwaka huu, ili kufanya ukaguzi maalum, kwa mamlaka za maji 24 nchini kati ya mamlaka 94 zilizopo, juu ya malalamiko.

Kaimu Mkurugenzi Mkuu wa EWURA Mhandisi Godfrey Chibulunje alisema, wakati wa ukaguzi, EWURA ilibaini udhaifu

katika usomaji mita, ubambikizaji wa bili hasa Mamlaka ya maji Kigoma, Ubovu katika mita za maji kwa Mamlaka za Maji iringa na Njombe.

“Baadhi ya Mamlaka za maji kutoza bili kwa kufanya makadirio kutohana na kuharibika kwa mita za maji, mfano Mamlaka ya Maji Tanga. Pia baadhi ya mamlaka za maji zimekua zikitoza bei zaidi ya zile zilizo idhinishwa na EWURA hasa katika magati, Mamlaka hizo ni Mbeya, Makambako, Songea, Tanga, Iringa, Shinyanga, Kahama, Geita, Arusha, Moshi, Babati, Ngara na Kigoma” aliongeza.

Mhandisi Chibulunje alisema kwamba, kutohana na matokeo hayo, EWURA imechukua hatua kadhaa, ikiwemo kutoza faini ya Tsh. 500,000/- pamoja na kuwafidia wateja kwa mamlaka za maji Tanga na Babati zilizobainika kuza maji kwa bei isiyoidhinishwa na EWURA.

“EWURA inatarajia kuwasilisha Mamlaka ya Maji ya Tanga, Babati

na Kigoma kuchukuliwa hatua za kinidhamu na mamlaka za utezi kwani zinatajwa kuwa sugu kushindwa kutatua malalamiko ya wateja, ili hatua za kinidhamu zichukuliwe” alisema.

Mhandisi Chibulunje anabainisha kuwa, EWURA imeziagiza Mamlaka za Maji za Mbeya, Songea, Makambako, Mwanhunzi na Gairo, zijieleze kwanini zisichukuliwe hatua stahiki kwa kukiuga maagizo ya EWURA

Mhandisi Chibulunje alisema EWURA itaendelea kuchunguza mamlaka zingine zilizobaki na kuchukua hatua stahiki, katika kuhakikisha utoaji huduma unazingatia matakwa ya sheria, kanuni na taratibu, pia kuhakikisha wananchi wanapatiwa ankara zinazozingatia bei iliyo idhinishwa na EWURA, pamoja na usahihi katika mita za maji kwa maslahi ya wananchi kwa ujumla.

EWURA yachangia fedha za vifaa tiba kwa wodi ya watoto njiti Dodoma

Na Tobietha Makafu



Wafanyakazi wanawake wa EWURA wakikabidhi msaada wa vifaa tiba vyenye thamani ya shilingi milioni tano kwa ajili ya matibabu ya watoto wanaozaliwa kabla ya wakati kwenye kituo cha afya Makole jijini Dodoma, hivi karibuni.

Katika kuadhimisha siku ya wanawake duniani, watumishi wanawake kutoka Mamlaka ya Udhibiti wa Huduma za Nishati na Maji (EWURA), wamekabidhi msaada wa shilingi milioni tano, kwa ajili ya kununua vifaa tiba kwa watoto wanaozaliwa kabla ya wakati kwenye kituo cha afya Makole jijini Dodoma.

Akikabidhi msaada huo katika siku ya Wanawake duniani, Machi 8, Mwenyekiti wa Wanawake, Chama cha Wafanyakazi Serikali Kuu na Afya (TUGHE) Tawi la EWURA, Bi. Herieth Kasilima alisema, katika kuadhimisha siku ya wanawake duniani, wameamua kutoa msaada kwa watoto wanaozaliwa kabla ya wakati ili waweze kuhudumiwa vyema.

"Tunaishukuru Bodi ya Wakurugenzi na Menejimenti ya EWURA, kwa kutuwezesha wafanyakazi wanawake kutoa msaada huu, tunaamini utakua ni faraja kwa wazazi wanaopata watoto njiti, tunaamini vifaa hivyo vikinunuliwa vitawenza kusaidia jamii kupata huduma bora ya afya," alisema.

Alisema baada ya kupata taarifa kuwa, kituo hicho kipo katika mpango wa kuanzisha huduma hiyo, wao wameamua kusaidia kukamilisha kwa wakati wodi maalumu ya watoto wanaozaliwa kabla ya wakati.

Akipokea msaada huo, kaimu Mganga Mfawidhi wa Kituo cha afya Makole Dkt. Tumaini Kapungu, aliyashukuru wanawake wa EWURA kwa kuona umuhimu wa kutoa

msaada huo. Dr. Kapungu alisema kituo hicho kimekuwa kikipata watoto wanaozaliwa kabla ya wakati, na kipo katika mkakati wa kukarabati wodi kwaajili ya kuwashudumia.

"Nawaomba watumishi wa mashirika na taasisi nyingine, kuona namna ya kujitolea kutoa misaada kama hiyo kwa sababu uhitaji bado upo, vifaa vinavyohitajika katika wodi hiyo vina thamani ya shilingi Milioni 27 ikiwemo Ukarabati wa wodi hiyo" alisema.

EWURA ina jukumu la kuleta matokeo chanya na kukuza ustawi wa jamii kwa ujumla. Ili iweze kufikia lengo hili, EWURA ina sera ya kuchangia na kusaidia taasisi zenye uhitaji, huku ikizingatia vigezo na masharti kwa mujibu wa muongozo uliojiwekea.